



## Вулэң ёх кеша верты пормасат

Округ куцаев партапса хуват, 2021-мет таҥ элты тац хотатан касадман яцхты айдат ёх хоттэдата «чумовой капитал» маты питса. Тохи лунгасты ар пелак пормасат ёшан верлайт. Шци кеша, Овс мув шимлаң мир ёра вер туты ёх па общинаята пилташам сот молтас хоят шци волаң вер тулат.

Пормас лэщатты рупата таҥ сус манал. Сус элты тови унты вулы сохат акатлайт, хотхар сохда рахты па ул юха лэщадаты юхат эватлайт. Хошам хатлат ёхатты порайн, пормасат мосты щира лэщатлайт.

«Ханты хоятат ай тэдан верантты хошлат. Мет олңа ёнтман, ай ухлыет, хотыет вердат. Уна йитэдан, ёшан туп дайм па кеши тайман, лувилала мосты вулэң ухлат, лак келат, улат, ныр юхат лэщатлат. Луп, лох, пасан, улас, муй пормас юх элты, щит иса ёшан шци верда. Хот лаңкты сох лэщаттын, рупатайд ищи ар па даварт. Сох соралты, ёталты, таталты, ёнтты мосал. Шци ёш рупата иса нэңатан верда.

Куртатан улты ёх, тамац рупата верман, кушкепа еша ох шитлат. Таҥ пенсия хоца, молты нётапса. Шци тумпийн па нёхратты рупатаен ант ёрэмалэн, айлат ёх уталтаман верэн елды тула», – елпи Мужевской совхоз тац хотан яцхам ху Эдуард Сандрин ястас.

Кев сыд районан па Янна Кондыгина, Виктор Лаптандер, Пётр Худи, Анатолий Тайшин, щалта па МУП «Паюта» хоца рупитты ёх тамац рупатая пилташман улдат.

Янна Кондыгина Сергей ийикел пилан Зелёный Яр курт элты. Яртыяң тада йис,



Хор: Галина Сязи

Питлор куртаң ху Антон Иосифович Сязи ухал верал.



хоты дын шоши мир хоятлува нётап тулдан. 2021-мет таҥ элты сот ветьяң ухал версаңан. 2026-мет талдан ялап нэпек ханшсаңан, таҥ сус хутьяң педа нял ухал верты мосал.

Лорвош районан тамац тус ёшаң хоятат па улдат. Лув кутэдан Антон Иосифович Сязи. Елпи ООО «СП «Горковское» тац хотатан

рупитас. Ар таҥ бригадира ус. Пенсия манмал юпийн, Питлор куртан ул. Рупитты утлам хоятэв, верды омасты ант верытал. Лув ищи «чумовой капитал» кеша мосты пормасат верал.

Тамац нётапса, елпи туп ар няврёмаңа ювам хоттэдата мийдыса. 2025-мет таҥ элты па кимет няврэм сэма питтын, маты питса. Йи пуш маты нётапса тэдал, ох щиран, ветсот щёрас молтас солкувая хойл.

Велщи тац хоца рупитты манты айлат хоятата, щит шеңк ям нётапса. Нялъяң педа вет ул юх, хот лаңкты арат кат таҥ нюки па кат парцин лак, карты кур пилан кур илпия понты карты, хотхар сохал па кат вулэң ухал тохи лунгаслат.

Там пор унты, Ямал мувев доватан,

ветсот педа ветьяң хут хоттэд «чумовой капитал» ёша маса. 2026-мет таҥ кеша сопаса, холна хольмаң педа лапат хот тэд лэщатты мосал. Шци волаң рупата туты вер хоца, шоши мир верантты, тус ёшаң хоятлув лойлат.

Зоя Куртямова ханшам потар

## Мосты емаң хатл

Там лапатаң хулам хатл щутщалув. Ин йиңк хуват юш пуншман ул па, щипан ар пелак хоятат куртат педа рутлал хоца яцхлат. Хой вошан хацал, ищи марэмаман ант омасал. Хой мосаң унт сыд унты шушилдыл, муй па вош лыпийн манты каш харата пилташыйл.

Уц тылац катхоцьяңмет хатадан муң Россия Хатл постадув. Уц тылац 12-мет хатадан 1990-мет талн РСФСР народной депутатат Олаңмет съездан Декларация ханшлтаман ус. Щита по-

тар манас: Конституция па РСФСР законат союзной актат нумпийн мет волаңа лойлат. 1991-мет талдан ищи хатадан мет олаң Россия Президент

пирыса. Унашак ювам хоятат нумлат, хоты шци верат манылдысат. Борис Ельцин шци порайн нох питас. 2002-мет таҥ вуш элты – «День Рос-

сии» хатла йис, па шци веран аратал нэпекат иса туңа-щира лэщатсайт.

Там емаң хатл онтасан хоятат ин йи хатл па щутщалат. Вошат па куртат доватан турамсот касапса па каш харат верлайт. Кашң мир лув хорамал, лув лумтамад алял. Мет ун онтас верам хоятат мойдапталайт. Хоты там хатл округ доватан постаса, щит элты па этты газетаятан ханшлдув. Щутщаты хатлатан «Ямалица» касапса хоты манас, щит элты па луңатлаты.

Аллина Тоярова ханшам потар



Хор: ЯНАО губернатор пресс-служба

# Закон нэпек лэщатты ёх



Хор: Александр Тесленко

Там лапатам Хон мувев доват ар-сыр регионат элты ошаң па нумасты хоятат Пулңават вошан актащисат. Ямал мувев Законодательной Собрание хоша «Диалог парламентариев» нэмпи форум дарпилдыса.

Тампуш Россия хон мувев доватан 120 тал постада, хоты мет одаң нэпека понам законат этты питсат. Российской империя 1906-мет талн ун кер тыдащ 27-мет хатадн мет одаң Государственной Дума пуншса. Щи хатл элты Российской парламентаризм тал-луңат луңатты питсайт.

Там емаң хатл кеша Тюменской, Челябинской, Свердловской па Волгоградской область, Ёмвош па Красноярской край муват, Карелия, Саха (Якутия) па Донецкой Народной Республикайт элты законат лэщатты щира рупитты ёх ёхтыдысат. Лув потарсат па альсат, хоты лув мувдалан



шоши хоятдал кеша улапса кенашак верты ураңна, хув номпсаң ошаң ясңат нэпека пондат.

Уйтантопса хоша арсыр улапса верат элты потар манас: хоты мосал еңқа муван ар ятпи улты хотат омасты, ядап яңхты юшат туңа-щира верты, ицки кутан нампар йи лота акатты па Водаң ляль порайн рупитам хоятат кеша емаң хатл постаты унты.

Муң шоши хоятлув мет такан худантсат хоты сахат па муватан шимлаң рут мир хоятат кеша ханшам законат онтас верлат. Кашң Овс мув сыдн, хота шимлаң рут мир хоятат улдат – мув илпийн мув шув, мув тут йиңк па сорнет улдат. Щи тынаң отат нох карадыты ураңна арсыр тахайт элты ун нефтегазовой компаният этсат па рупитты ёхдал пелтациман ёхтыдылат. Хоты сахат шоши хоятлува йи номас понман щимащ ёхтам хоятат пидан улты, потрэмиты па муй верты. Щит элты потар манас:

– Мет такан Россия мувев хоша Закон № 2395-1 «О недрах» элты потарса – хун промышленной компаният мув элты тынаң сорнет па мув шуват нох ёхатлат, щи ураңна лув шоши хоятлув улапса кеша нётап ат верлат;

– Закон № 82-ФЗ «О гарантиях прав коренных малочисленных народов РФ» ищи еша туңмалты мосал – мув сорнет нох карадыты елпийн мосал этнологической экспертиза верты. Щи щираныты питда рахад ки мув нох хырты,



хоты сахат шимлаң мир хоятат елды улты питлат;

– Шоши шимлаң рут мир ясңат кеша мосал ун онтас верты. Энамты па айдат ёх, хой рут ясаңдал елды туты вуратлат, проектат щиран нётты.

Хоты Ёмвошн хантэт па охалят улдат Еремей Айпин айкел верас. Холдна ар потарса хоты сахат мосал улапсаев кенашак па ямашак верты. Щи ураңна шоши хоятлува ищи мосал кущайт педа ещад манты, ант палты па мосты верат элты потарты. Хун улапсаен яммалты вутцилэн щит элты едамты ант мосал.

Якутия мув элты Константин Роббек па Красноярской край элты Григорий Дюкарев ёхтыдысат. Лув мувдалан шоши хоятдал кеша ун онтас верлат па нэпек щиран нётлат. Хоты лув ясталаат, Ямал мувеван улты шимлаң рут мир хоятлув кеша ищи мосал онтас верты па нётты хоят. Муң нумастэван ешауд муң хошаев ищи щимащ хоят этад.

Иван Сандрин ханшам потар



Хор: Александр Тесленко

# Шимдаң мир хоятат хоща яңхас

Там лапатаң Ямал губернатор Дмитрий Артюхов Пуровской район Харампуровской нюрман улты Агичев хотгэд хоща яңхас. Кашң луң 2022-мет тал вуш элты лув касдыман яңхты мохет хоща мойңа улдыл.

Агичев хотгэд Пуровской районан шеңк яма уйтла. Лув тащ шавидат, вой-хул велпасдалат, щукшатлат. Мет волаңа щита Лилия Кантлевна Агичева ул. Лув хул па велпаслаты мохет хотгэдан сэма питас. Унтан улты урат па ёрң ёх элты рутлад улдат. Унтаң улапса щир шеңк яма уйтладды.

Ийикел антома ювам юпийн лув атэд вет няврэмал пилан хащас. Ун похада щи порайн нялхощяң тал ус. Улмад сьс



Л.К. Агичева па Д.А. Артюхов потар тулдан.

няврэмат кочевой ашкуда щиран уталтасды. Хулам похал па кат эвел элты ин хуламхощяң хилы тайл. Лувилала верьттал кеман иса нётал. Лув ищи нюрман

улдат. «Верхне-Пуровской» совхозан па «Пуровской» общинайн рупитлат.

Кат хатл сьс тащ акатсат, лэтот каварсат, ётлацсат, хул

велпасдасат. Щи тумпийн аратад мир Совет старейшин хоща актащисат. Щита потар манас, хоты там хатлатан энамты няврэмата елды нётты мосал. Сох юкана няврэмат мослат сертификата-тан мийлыты, щи порайн лув лувилала мосты лумтам лутты верьтты питлат. Леккар даращат ялпитсайт. Па елды хатлатан нумасла, нюрман улты мохет па мув суңата щутщаты китылыты. Щи порайн лув кушкепа еша ёлта рупата элты щутщалат.

Тамиты яңхман округ куцаев аршак шоши мир улапса элты уятал, муй хорпи нётоса мосал – иса постад. Щи веран, мосал, аратад улапса кенашак йил.

Аллина Тоярова  
ханшам потар

## Хоятата самаңа нётты рупата

Ущ тыдащ 8-мет хатадан Хон мувев доватан хоятата нётты щира рупитты хоятат емаң хатл постасат. Руц ясаңна щи хоятат социальной работниката айлдайт. Щимац тахайн хоят пела туп шеңк-шеңк самаң хоятат рупитлат. Там лопасан щимац хоят элты луңтадан. Щит Анна Романовна Туляхова.

Там емаң хатлэв тампуш 26-мет пуш постада. Щи кеша ай тахайт потты тыдащ 27-мет хатадн 2000-мет талан Хон мувев куца ху Владимир Путин партапса ханшас. Пирцамам, мушаң па лавартаң хоятат ивеван элты вантман тайты мослат. Хой няврэмат па ван рутат ант тайлат, щит хоща нэман рупитты хоят лэщатла.

Щимац рупатайн хольмаң пела вет молтас тал Анна Романовна рупитал. Лув хоят пела шеңк самаң па лэпат хоят, муйн верьтал, иса нётал.

Анна Романовна вулэң хотгэд ёх хоятат хоща щёхар тыдащ 26-мет хатадн 1970-мет талн Лорвошан сэма питас. Ащел Роман Иванович па антел Ульяна Семёновна Возеловдан. Антел Овкорт элты, эви опрац нэмад – Лонгортова. Лын няврэмалд вещьката энмалсалдан, иса ям хоятта йисат.

– Ма лапат тал доватан Лорвош ашкуда тусайм па щита яң тал уталтысам. Ашкуда юпийн ай леккара рупитты лаңхасайм па щи кеша медицинской училище хоща уталтыты питыдысам. Еша уталтысам па щи вер манэм ант рахты питас, – Анна Туляхова нумалмиман ястас. – Щи порайн Лорвошан лапка нэңат моссат. Щишан ма Пулцаватан кооперативной профтехучилище хоща лапка нэңа уталтыты мантсам па ущ тыдащ 20-мет хатадан 1991-мет талан лувел етшаптасэм. Па мохты, уйтлор

тыдащ одаң хатл элты Муже вош рыб-кооп хоща рупатая этсам.

Щиты уталтыым щиран, Анна Романовна хут тал самаңа рупитас. Щи юпийн нянь верман рупитас па кладовщик щира база хоща улдыйс. Пора хащман лув па елды уталтыты номас понас – ищипа хоятата нётат туты вуратас. Заочной щиран Пулцаватан улты Овс мув шимдаң мир А.М. Зверев нэмпии педагогической колледж хоща няврэмат хатл сьс шавиты нэңа уталтыты питас. Щи кут рупатая вохса.

– Социальной работника рупитты вохсайм. Ван хатлап тыдащ одаңмет хатадан 2000-мет талан рупатая этсам па инты унты щита рупитлам. Щикуш заочной щиран няврэмат хатл сьс шавиты нэңа 2003-мет талн уталтыты етшаптасам, вурты диплом ёша паватсам, ищипа уншак хоятлам пилан рупитты хащсам, – Анна потартал. – Ванан улты хоятлама нётты уталсам. Ма рупатаем щиран утца хащам, пирцамам па лаварта ювам хоятата нётты мосал: хотдал сыстамтаты, лэтот лутты па каварты, сохдал пусты, портунат лутты па муй лувилал мосал, щит верты.

Хув па самаңа рупитты ураңна, Анна Романовна ар пуш ишканцап нэпекатан рупата элты юканыса, мойлапсаятан Лорвош район куца элты мойдыдыса. Каматса тал хащман емаң хатлэд кеша лув Благодарность нэпекна Ямал социальной защита департамент элты мойлаптыса.

Анна Романовна, ийикел Виталий Петрович Туляхов пилан лэпат самаң хояттан, ешауд хольмаң тада йил, хоты ияха улдаңан. Йи эвие энмалсаңан. Ин па лувела кат хилэңалал энмалты нётлаңан. Хун эвиел уна йис па уталтыты манас, утца ал улты ант верьтсаңан.

– Мин нумасты питсаман шукащты няврэм вуты па энмалты. Щиты ма нэпеклам



Хор: Анна Туляхова

акатсам па Киров воша яңхсам. Щи вошан антиды-ащиды хащам няврэмат улты хот ул. Ай похие кащаласам па щикем щаль питас, – Анна Туляхова ястас. – Лув нэмад Андрей Грачёв, щи порайн хулам тал доват ус. Ма лувел патан вусэм. Ин похиём 12 тада йис, хутмет класс уталтыты етшаптас, лапатмета питас.

Елды Анна Романовна тумтака ат ул па вещьката рупитал. Тамащ самаң хоятат муң ханты хоятлүв кутан улдат па яма рупитлат. Ванан улты хоятлада муйн верьтлат, щитан нётлат.

Иван Сандрин ханшам потар

Там лопасан «Овс мув ольпат» касапсайн нох питам ханты няврэмат ханшам потрат па хорат пондув. 10-14-мет доват эвет па похат кутан Охсар вошан удты няврэмчан одаң местая этсаңан. «Семейные традиции» номинацияйн Юрий Худи нох питас па «Традиционные игры и игрушки» хоца Людмила Вэненго мет тус улмал.

## Касапсайн нох питам рупатайт

### Вул хаттэл олапсы

Ма сэмна питсам кадаң хатна. Адаң антап ол хоца дайис. Амэм касаң хатл антап нёхалсаллы па арна арислы. Ащем ищи кадаңна яңхты нэңхы. Муң хув йис олапсы тайлуд. Лув катра тэдна олты отат. Щи аса олапсылуд хаттэл эвалт лайлат.

Касаң алаңсахат ор хатна посаң па сай эпална авал. Най ходна нох сэңк ант этас, ащем тынщаңал ямас вантыял.

«Ям тынщаң – номсаң ям яй хорпи», – щиты лув лавал. Тынщаң кадаң катлад па так ватасна, мастал порайна наңен иёлты нятдалды. Щи юпина муң аса ким этлуд, кадаңлуд вандаллуд. Кадаңат муңев олты олапсэв нятлат. Щит сэңк масты верлуд – савиты, ат савитытат эвалт вандалуд. Кадаңды муң ор хат, хасам масаят па йилап ёс тайты ан питлуд.

Итта манэм холамошоцъёң тал тармас, ма Охсар похолна хутмет классна аскодайна онтылам. Тынщаң явалты хаслам, щи вер айтэдна ащемна онтасаям. Хунты ащем ай олмал порайна, лув ищи ащедна парса. Щи аса тосаң верат ал яснат хунт олдат. Катра пора эвалт муң хоцев ёхтам атат. Щи верат эвалт муң ал ан потарлуд, муң лувилал алнась тулэв.

И порайна ма ащемна тынщаңна масаям, щи тынщаңна ма кадаң катта вучисам. Тынщаңам китсэм, кадаң хоты хун катсэм,



Хор: Юрий Худи

луд сэңк вул ос. Еса сэмъйңкдам манты питсат. Амэмна па ащемна такан апал-масаям па лувчан манэм лавсаңан: «Итта наң оцдан, хоты масл кадаң ярколата!» Щи пора эвалт ма номсэм ёхтас: «Хунты вулды йилам, вул па ёр кадаң ищипа катлам!».

Там хорна щи вер ямас ныла, хоты ма кадаңдам ал нёхамлат, ма тынщаңам ясна такан катлэм, ванлэм мала кадаң катта. Луват такан нёхамлат, топ топайдал идпина, хоты дащ порамты сый щатл. Тотасак муң ор хатув ныла. Лув хоцнедна амэм ма



Хор: Фелипп Сязи

пелэм ванл. Ор хатувна иёлты хасам, иёлты кор лыпина тут дыл. Вул нэңхэт катра йис тэдна щиты лавилылат: «Тут хоца ан рахал пальщаң лякты, тут пилна янтта, атмащ тайта. Емаң тут ими ямас па щалит-

ман тайта масл». Щит ищи муң олапсэв.

Хунты кадаңна яңхтэвна муң кутлудна ямас холатман па нятман оллуд. Касаң нэңхы лув верл верта масл. Ащем па вул яйем тащ ванлаңан па яха акатлаңан. Амэм ор хат лыпина тут адал, сай каварл па йинтасл. Ида пелайна муң яха актащлуд, лыты юпина ащем па амэм манщат лавилылат. Щи манщат сэңк муң омщаладуд, кас холантта!

Тохал нэңхэт номаслат, хоты кадаңна яңхта па ор хатна олта щёкат па атам. Манэм ма щемьяем – щит вул мур. Ор хатна так ищкина

хасам олдиял, хунты аса яха актащлуд. Итта ма номаслам, вулды йилам ма ищи кадаң тащ, ор хат па тынщаң тайта питлам. Щи ям верат ма нявремлам хоца лаваллалдам, хоты манэм ащемна па амэмна парсаям. Кадаңдам, рот мувием, рот нэңхылам омщаламан па савиман тайта питлэм. Аса мала муң тайлуд, щит хаттэл эвалт па хаттэл хоца.

Ма хорам хоца топ кадаңат па ях няврем тынщаңал пилна. Щи хор, ма олапсэм! Щит ма ротам, ма тохалдам, ма хаттэдам!

Юрий Худи ханшам потар, 6 класс.

### Акань

Итта ма хантэт янттыт пуляң лавта вутчидам. Щит акань. Лув сэңк хуван верса. Холна муң вул-вул омылудна. Щи акань лавд хантэт рот пуляң. Хоты осат кара олты нэңхет. Хунты ханты ротна, ның няврэм этал лувел омына янттыт верл.

Вас няд эвалт, лувел акань верл. Ернасат па сэват верл. Сэңк хорамми верла. Хунты ның няврэм еса энамл, омэл лувел онталды, хоты масл акань хоца масаят янтыста. Хоты ның няврэм акань вералды, щи лавилисат, мала хорпи лув верты ими питл.

Ма хунты ай осам, манэм вул опы, лув яныт акань майдас.

Щи акань щилта ма янтты пидам ос. Ма омэмна онтасаям, хоты сэв сэвта масл, ернасатна па масаятна йинтта. Ма аканьямам иёлтыйи ма пилэмна ос. Ма пилэмна лис, хояс.

Акань сэм, нял, ув ант таяс. Хантэт щирна ант рахал, акань хоца сэмат, ув, па няд верта. Имсайна куль щита олта питл. Ма аканем тал масаят таяс, щит сах. Луң масаят таяс: ернасат па ной сах.

Аканят порлаты ваят эвалт версаят. Тохтаң няд – щит шепан ос, вул хулты – щит ащи, ай хулты – щит омы, энамты вас няд – щит ның няврэм, путы вас няд – щит пурац

ими. Ернасат па осат, мала хорпи акань, энамты, пурщам па ях ос.

Энамты аканят хоца хораман, сэмаңан, вурты щипканат йинтсат. Пурац аканят хоца лорты щипканатна йинсат. Ной сахна, тал сахна, ернасат хоца мала хорпи хансат вердат. Сэңк хорам аканья йил. Омащ вантты. Сахат па ернасат холна тунна йинтсаят. Акань щит кара пора вер хантэт рот, щит хантэт олапса, хоты лув осат. Ямми таяты па хуввы туваты щи хантэт олапса.

Людмила Вэненго ханшам потар, 5 класс.



Хор: Людмила Вэненго

# Хота муй вер этас

• Ялап тала ювам юпийн, ветсот хоттэл олаң пуш ар няврэмаңа йисат. Няврэм сэма питты вер хуват Уральской Федеральной округ регионат кутан Ямал мувев олаң тахайн. Хон мувев доватадан вуты ки, муң худмет.

• Округ куцаев рупата сахат, кашң луң тащ хотаң ёх хоца яңхал. Тампуш лув Пуровской район педа манас па Агичевы хоттэл мохет хотан каматса хатл ус. Касадман яңхты ёх хоца улман, ёша-кура лув сэмадан улапсаел вантсалды. Хотаң хоятлаң пидан потрэмийс па рупатая вуты верат лэрапсалды.

• Тал сыс айлат ёх кутан, щёрас молтас хоят спорт щиран кашң хатл каман юращты, хухатдыты, наварты, ништантыты верытлат. Щимащ вер верты ураңан, округев хуват экстрим-парк харат пуншлайт. Тамхатл кеша Новый Уренгой, Надым, Губкинской па Пулцават воштан тамащ харат рупитты питсат.

• Округеван маты нётапса вер кашң тал тэкаптада. Тампуш, щёхар тылащ элты, леккара

рупитты айлат ёх кеша ялап нётапса верла. Университетан ведщи уталтыты етшам па наставничество программа хуват леккар рупатая доңам эвет-похат, хот митадаты сахат охан маты питлайт.

• Ямал мувеван «Ма хотволэм» тал сыс манты программа рупитты питас. Тампуш, округеван улты лапат вошан, нялхощъяң хотвол хар яллаптада. Няврэмат ёнтты па юращты харат ялап пормасатан лэщатлайт, шушты юшлад па машинайт омасты лотат лащкама верлайт. Юхат па лыптит омаслайт.

• Хошам хатлат пидан, унтаң войт па нох вердасат. Лэтит каншман, вошат па куртат пуңадан ван кутан элтыты питсат. Щит ураңан, унт юш хуват манман па унтан улман, еша хурыман улаты. Вой кашалатын, 112 номер хуват мохты айкел вераты. Элты нюхалман ал тувалдан, лэтитан ал лаптадан, вана ал вохалдан, нын па вана ал манаты.

Зоя Куртямова лэщатсалды



Хор: ЯНАО губернатор прес-служба



Хор: Людмила Гурьева

## Василий Иванович Шульгин хув паната шушмас

Ас нопатты тылащ 29-мет хатадан Ёмвошн Василий Иванович Шульгин антома йис.

Лув 1952-мет талн лыпат хойты тылащ 10-мет хатадан

Лорвош район Илья куртан Волаң Ляльн лялясам Иван Филиппович Шульгин хоттэдан сэма питас. Лув худмет няврэма ус. Хунты лув потартас, Микуль (ханты мирэв олаңмет поэт ху) ун яйл педа вантман ищимащ хатнэхуя йиты лаңхас.

Ашкулдайн яма уталтыйс. 1968-мет талн Асов куртан нийл класс етшаптам юпийн Ёмвоша манас. Щита педучилищайн экзаменат яма мас па ай няврэмат уталтаты вер элты оша пайтты питас. Елды па Ленинград вошн А.И. Герцен нэмпи педагогической институтн уталтыйс. Щи порайн ипуляң Ёмвошн улты «Ленин пант хуват» (ин «Ханты ясаң») газетая Овс мир айлат ёх уталтаты верат элты айкедат ханшты питас.

Нэпекаңа ювмалн Суматвош район Тэк куртан няврэмат рущ ясаң па литература уталтас. Елды Ёмвоша каслас па «Ленин пант хуват» газетая айкедат актас.

Щалта ар тал округ правительствайн па Дума хотан рупитас. Щилта щутцаты манас. Вещката рупитмал ураңан арсыр ишакты нэпекат па мевл посат тайс.

Ульяна Николаевна (эви опрац нэмл Рандымова ус) имед пидн хут няврэм энмалтас, хилыдал энмалты нётас. Лув номпсаң па каркам хоята ус. Муң лувел щимащ хоята нумман тайты питлэв.

Лув щемьяеда, рут ёхдала, духасдала щаль ясаңат китлув. Муң па шук тулув.

## Сорашак айкел моцатты ураңан

«Лух Авт» газета кашң лапат йи пуш этлдыл. Тухал ишан, ёхаттал унты талаң лапат хащал. Щи веран, сорашак айкедат моцатты ураңан, нынан мосал «Лух Авт» понылдыты айкедат «ВКонтакте» па «Одноклассники» хоца моцаттыты.

Щи ураңан там QR-код мохты доңаты, па муң верыдыты айкелдува ханшлтытыты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел понылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха пона-сман елды тулэв, ханты мир ясцев шавилэв!



### ОБЪЯВЛЕНИЕ

**СЛУЖБА ПО КОНТРАКТУ В ВС РФ**

ПОЛНАЯ ИНФОРМАЦИЯ ПО ТЕЛЕФОНУ  
+7 (902) 816-11-90  
+7 (34922) 3-98-08  
ЗВОНОК ПО РОССИИ БЕСПЛАТНЫЙ

**ВРЕМЯ ДЛЯ ВАЖНЫХ РЕШЕНИЙ!**

**КОНТРАКТНАЯ СЛУЖБА**  
**6 700 000 Р**  
ЕДИНОВРЕМЕННАЯ ВЫПЛАТА  
**4 000 000 Р**

ПРИ ЗАКЛЮЧЕНИИ КОНТРАКТА НА ЯМале

Прибыльщики из других регионов освобождаются от уплаты налога на имущество физических лиц в С.С. Салехарде. В период оформления проживания в С.С. Салехарде и 3-е годовое питание предоставляется бесплатно.

**ОБУЧЕНИЕ:**

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ ПОДГОТОВКА
- ✓ МЕДИЦИНСКАЯ ПОДГОТОВКА

3 600 000 Р  
400 000 Р  
до 120 000 Р

**ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т. Р**

Там QR-код хуват доңаты па вантаты, муйсыр нётопсайт СВО хоца улты мохета мадайт. Щи тумпийн нэңдала, няврэмдала, аңкидала па ащилала ищи нётопса вуты рахал.



# Хон мувев емаң хатл

Ущ тыдась катхосьяңмет хатадан Россия мувеван волаң хатл постада. 1990-мет талан Декларация лэсятса, Хон мувев атэд мува луңтасты питас. 1994-мет талан «День России» хатла нэматса, государственной емаң хатла ханшлтаса. Си пора элты си емаң хатл постаты питса.

Россия мувев шеңк ун, па муват кутан олаң тахайн ул. Ар мир хоятат муң мувеван яха улдат. Волаң емаң хатадан яха ёхтыдылат: митинга яңхлат, каш верты харатан уйтантыдат. Ай няврэм элты ун хоят унты сэма питам па энмам мувел самладан тайлэд, улапсаел шавилэд.



Хор: Инна Русмиленко

## Хон мувев элты муй уйтлаты?

Там инсясапсаятан хулам ясаң элты йи мосты ясаң пирыты мосал.

- Улты мувев муй нэм тайл? (Русь, Россия, Белоруссия);
- Муй вош хонмувеван волаң воша луңтасал? (Хон Петра вош, Москва, Казань);
- Муй хорпи ольпат хон мув вотвойн улдат? (Нови, восты, вурты; Лыпат хойм, нови, вурты; восты, питы, вурты);
- Москва вош волаң таха, муй нэм тайл? (Красная площадь, Мамаев Курган, Кремль);
- Муй юх Россия мувеван волаң юха луңтасал? (Сумат, хул юх, пасяр).



Хор: Инна Русмиленко

## Блиц-инсясапсайт

- Си инсясапсайт хуват туп йи ясаң: яна муй па антом ястаты мосал.
- Хон мув емаң хатл талан постада?
  - Россия вотвой хулам оляп тайл?
  - Хон мувев па муват кутан мет ун?
  - Хон мувеван Хон Петра вош мет волаң воша луңтасал?
  - Хон мувеван ар мир ёх ул?
  - Хон мувеван йи волаң ясаң?

## Ант мосты ясаңат нох вуйты

Нял ясаң элты йи ант мосты ясаң нох вуйдан.

- Москва, Хон Петра, Париж, Пулцавт.
- Вотвой, герб, торт, хон мув волаң ар (гимн).
- Сумат, ромашка, люм юх, нохар юх.
- Матрёшка, балалайка, гитара, самовар.



Хор: Инна Русмиленко



Хор: Мария Возелова

## Тасяң па хорам мувев

Кашң няврэма лув улты мувал мет хорам. Мет ям ясаңат энамты муван элты ханшаты, ольпаң хорат лэсятаты.

- Вотвой оляптаты.
- Муй наң урцена Хон мувев? Ай потар шупие ханша па хоран лэсяты.
- Па вош няврэма письма ханша. Улты мувен элты каматса ясаң туви: хота наң улдан, муй мет хорам тахайт вошен тайл, муй тахая яңхты рахал.
- Лыптит элты букет лэсяты. Нэпекан лыптит омасты хошап сюрта. Сялта ханшаң нэпек элты ольпаң лыптит эвта па ваза хося ханалтадан.



Хор: Инна Русмиленко

# Тахар ики хулам эви

Тахар ики ус. Имел хуван сорма питас. Хулам эви тайс. Эвидал уна энмалтсалды. Имолттын пирщамаса па ун эвел пела ястал:

– Эвие, ой каншты лудан яңхан. Наң ши вантлэн, хотэм иса катрая йис, хотэв йи шуңал ил ши питал.



Хор: Зоя Курьямова

Щалта эвел хув юша мантал елпийн ястал:

– Эвие, дор па пелка ёхаттэн унты пуши келэн нох ал яры. Муй шицкилэңки уйтлан, муй вурщаклэңки уйтлан, холыена лэтот шукийн мешамтадан.

Эвел ши манас. Ун доршики шоппи вуншмалан, пуши келад ёлта щиты ши таласал. Ликал ёхтас, услы па келад нох ярсалды. Манман морта ши метас.

Муй савнэңат, муй шицкилэңкет лув хоңайл вана ёхтамтыдат, лув дый пилэла ястал:

– Муй ма пуңлэман тата авшемалты. Ма ищи метсам.

Ши манас, манас, катра хотата ши ёхтас. Ёхи лоңас. Ёлан, ова талам нампар – ова талам, мула талам нампар – мула талам. Хоталан йи норы. Ши норыя ши омпсас. Манман рувал вева ши йис, олмал ёхтас, ил войпса.

Имолты порайн, ат кутпа ювам кеман, хоят ши ёхатмал щалал. Ху ёхи лоңас. Антапал нови воян, питы воян лап тахартмал. Лаңкра понман унт хор лоңалтас.

Щалта унт хорал ил воцкасды. Вулэд нох хорсалды, нох лэщатсалды. Пут кавартас. Пут етшам кеман, путал нох хонтсалды.

Нёхел юх ана йи пелкал нэ кешийн понтсалды, йи пелкал па ху кешийн понтсалды. Ястал:

– Тахар ики ун эви, ма пилэман улты самен ки лаңхал, лэва. Ма пилэман улты самен ки ант лаңхал, ал лэва.

Эви нумасыйл: «Ант лэдам – атом, лэдам – ищи хорпи атом». Лэты ши омпсас.

Ши усан, усан. Лэтотдан па ши ходасат. Икел па ши унта манас, вой велты манты сонтамас. Вой велты мантал елпийн имел лапат хор сохан воцкасды.



Хор: Зоя Курьямова

Хор: Зоя Курьямова

Ястас:

– Ма ёхаттэм елпийн манэма сах ёнта.

Хор сохлад хоты саха верты, нэмолты хоятан щит ант уталтыса. Тахтэл еша полщанан ляксалды, хота еша татлэмасды.

Щалта кеши ус, сохал хотащ эватсалды па ёнтсалды. Ши кут,



Хор: Зоя Курьямова

ил оламтыйл ванттыя, ёшдал муй хорпет, курдал муй щиран манлат. Щиты сахал хотащ ёнтсалды.

Икел ёхатталан, хайилдым питы вой сох, нови вой сох ант па таталмал.

Па ши вой сох тус.

– Сахен ёнтсэн, етшас?

– Етшас!

Сахал нох луматса па лаңкардал элты ил лакнамтас.

Икел ким этдыйс. Ун наң элты йи нув сэвармас. Нувал яма сыстамптасды па тайн нёхарсалды.

Услы па, имел камн, ун наң тая нох тахарсалды:

– Улты ки ант хошлан, щита раниман лоя.

Ащел ики ёдан ши лавдасас, лавдасас. Ай эвеңалад пела ястал:

– Опан манас. Ал ям тахая уйтантас, ёхлы хун нумасал.

Кутап эведа ястал:

– Эвие, наң яңха-сары ой каншты. Наң ши вантлэн, хот шуңев ил ши питал. Ма пирщамасайм. Хот верты щём ант тайдам.

Ши, ин эвел ши манас. Тахар ики эведа ястал:

– Эвие, дор па пелка ёхаттэн унты пуши келэн нох ал яры. Муй шицкилэңки, муй вурщаклэңки уйтлан, хол лаптамтадан. Лый пилэлан ищи ортаса.

Эвел ши манас, манас. Пуши келад па ши ёлта таласал. Услы па нох ярсалды. Нумасал: «Муй пуши келэм ёлта таласал? Манты лаварт». Келад улды па нох ярдалды.

Па манас, манас. Шицкилэңкет, вурщаклэңкет лув пуң-



Хор: Зоя Курьямова

далан щиты ши щёвизат. Ин эви ёхлы лаватал:

– Муй ма юпеман яңхлаты. Ма па тата лэдды шушдам. Нянем щах айшукие хащас, манэм ант тармал.

Манас, манас, имолттын катра омасты хотата ёхтас. Вантылдыйл – ун наңк дойл. Наңк тайн опел нох тахартам. Нумасыйл: «Опем муй паратса, ма па муй, ищи щаха паратлайм?».

Щиталан, ёхатмал юпийн, холта манал, ёхи ши лоңас. Ёхи лоңас. Ова талам нампар – ова талам, мула талам нампар – мула талам. Хоталан йи норы. Ши норыя ши омпсас. Шушман вева йис па ил войпса. Куд олма питас.

Нох верламадан, ат кутап кема ювмал, каман патлам. Хоят ши щалал. Вошаң урт ики нымалдала паркатсалды, юха пут тахартас.

Щалта ин ху, ёхи лоңас. Анталд питы войн, нови войн лап тахартмал. Лаңкра па унт вой понмал.

Па ши унт хорал нох хорэмасды. Ин нэңал па омасал. Пут кавартас. Юх ана нёхилад нох хонтсалды. Ястал:

– Тахар ики кутап эви, ма пилэман улты самен ки лаңхал, лэва. Ма пилэман самен ки ант лаңхал, ал лэва.

Эви нумасыйл: «Ант лэдам – атом, лэдам – ищи хорпи атом». Лэты ши омпсас.

(Елды па ул)

Олеся Хандыбина  
ханшам потар

# Хошам хатлат си ёхатсат



Хув лаватты ван луцев Овс мувева шацкап ёхтамтас. Каматса хатл сус мувев мохты па хорпия йис. Тылась хасяс, хоты мувев иса нови ус: донсь олас, ецкев там ванан манас. Ин па иса хорам – кашц тахайн ваншед востыя йис, юхатан лыптит дарпилдасат.

Хошам хатлат ёхатман, ёлан омасты ант верытла. Няврэмат тадац хатл каман наварлат. Сютсяты хатлатан, кум тайман, хоятат аршак каман яцхлат, вош лепан улты унта манлат: нёхи шарытлат, шай йинсьдат.

Унтан мет сора хорамаца йил. Сумтат па хаш юхат ям доват лыптан этсайт. Худ юхат, сикүш тал сус восты ольпацат дойдат. Туп дув па па хорпия йисат: нувладан ялап шуват похнапсат. Нацк юхийт ялап восты йинтпатам энапсайт.

Муц па, куртан энамты хоятат, хошма йиты хатлатан унта яцхты дьтлаюв. Мувев ялпидьты сус Шитамкурта яцхсув: порьдысув, сыстам дьд шуван далсув, унт хуват, ёхан педа шушидысув.

Там лопасан сита верам хорат пондув. Кум тайман, нын па унта яцхаты, сютсяты, муцев хорам хорат китаты.

Альбина Тырлина ханшам потар

Хор: Альбина Тырлина

## Газета «ДУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д. 1, каб. 106  
+7 (34922) 4-68-63  
E-mail:  
luh.avt@yamal-media.ru

Учредитель  
Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д. 9, каб. 708)

Газета зарегистрирована  
Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

Тираж 1300 Заказ 198 тз  
Подписные индексы:  
на год – ПА700, на полугодие – ПР561

№ 24 (1327)  
Газета вышла в свет 13 июня 2026г.  
Подписано в печать 11 июня 2026г.  
по графику: 16.00  
фактически: 16.00  
Газета выходит по субботам  
Цена годовой подписки 88 руб.,  
в розницу не распространяется

Издатель  
Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д. 9, каб. 708)

Отпечатано в АНО «Ямал-Медиа»  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д. 1, каб. 106  
Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д. 39А

И. о. генерального  
директора  
АНО «Ямал-Медиа»  
Каврук  
Татьяна Ивановна

Главный редактор  
Яковлева  
Аллина Кирилловна